

– Այդ ուղիղ է: Բայց ես ի՞նչ իրաւունքով կարող եմ քեզ քարշ տալ այն փորձանքների մէջ, որոնց ես ինքս պատրաստել եմ ինձ համար...

– Ինձ համար միեւնոյն է, թէ ով է պատրաստել:

– Բայց դու գիտե՞ս, որ ես այս աշխարհում կորցնելու ոչինչ չունեմ. իսկ քեզ կարօտ են մայրդ, քոյրերդ եւ, վերջապէս, Սոնան: Դու չե՞ս մտածում ազատել նրան, չե՞ որ նա գերի է իր հօր, այն վայրենի հօր ձեռքում:

– Ես մտածում եմ... Ես մինչեւ անգամ խոստացել եմ ազատել նրան...: Բայց ես նրան կ'ազատեմ, քեզանից չբաժանելով:

– Լաւ, – ասաց նա խռովեալ ձայնով: – Այտոամենայնիւ, դու պէտք է ընդունես այս բնական. ուղարկիր մօրդ, թող նա քաղցած չմնայ. գուցէ դու երկար բաժանուած կը մնաս նրանից...

Ես հրաժարոտեցայ, խնդրելով, որ նա ինքը կարգադրէ որպէս ցանկանում է:

Կարօն համաձայնեցաւ: Բայց ես նկատեցի, թէ որպէ՛ս վառւում էին նրա լի վրդովմունքով աչքերը եւ ինչպէ՛ս անհանգիստ կերպով բաբախում էր նրա կուրծքը: Երեւում էր, խիստ ծա՛նր էր նրա այն համաձայնութիւնը, որ տոտեց ինձ իր մօտ պահելու համար...

– Դու պիտի ընդունես մի բանի պայմաններ, Ֆարիատ:

– Ամէն բանի յօժար եմ ես:

– Լսի՛ր. – քո աչքերը իբր թէ ոչինչ չեն տեսնում, թէեւ շատ բաներ պիտի տեսնես:

– Ես ինձ կոյր կը ձեւացնեմ:

– Զո ալկանջները իբր թէ ոչինչ չեն լսում, թէեւ շատ բաներ պիտի լսես:

– Ես ինձ խուլ կը ձեւացնեմ:

– Զո լեզուն ոչինչ չպիտի խոսէ, թէեւ շատ բաներ պիտի գիտենաս:

– Ես ինձ մունջ կը ձեւացնեմ:

– Դու սեփական կամքի տեր չպիտի լինես:

– Ես ամէն բանում կը հնազանդոտեմ քո կամքին:

– Եւ իմ ընկերների կամքին:

Եւ քո ընկերների կամքին:

– Բաւական է, տուր ինձ ձեռքդ:

Ես ձեռք տոտեցի, նա սեղմեց ինձ իր կուրծքի վրայ եւ համբուրեց: Այդ եղբայրական համբոյրը կնքեց մեր ուխտը...